

RÉQUIEM

Elías Veiga



ESTADÍSTIQUES

Según les últimes estadístiques namás unu de cada diez
llobos sobrevive,
solo unu de cada diez ye capaz de nacer, espoxigar, facese
llobu, [aprosimadamente].
Siempre persiguíu pola so solombra,
siempre sollerte pa salir pela puerta d'atrás,
siempre con un *plan b* na recámara.

Namás unu va poder esfrutar lo bono d'esta vida,
los amaneceres que dexen ensin palabres,
les tardiquines pacetibles,
la nueche xabaz.

Unu, unu solu de cada diez.
Un individuu qu'en bolsa diba quintuplicar
les hormones del riesgu,
un *escoyíu* de la natura,
de les polítiques medioambientales
iguaes nun despachu importante.

Un superviviente de raza ilustráu
nel temor a Dios.

POLÍTICA

La güela yera una *neobeatnik* rural
de vuelta de too —como toles güeles—,
una trapulera de llingua camaleónica
qu'esbabayaba con Kerouac
cuando un bon día topó col llobu
en mediu'l monte,
un señor llobu armáu con tola loxística de la fame
nun llugar desnudu llibre de prevaricación
llistu pa tener una amarradiella dialéctica
sobre l'usu de la razón.

L'ÚLTIMU LLOBU D'INGLATERRA

L'últimu llobu d'Inglaterra
nunca lloró la so desgracia
nin se compadeció de sí mesmu
—nin de los demás—,
nunca pensó n'escibir una carta de despidida,
un adiós emotivu, unes últimes pallabres pa la historia.
Tampoco nun dexó testamentu
—la so descendencia y familia fueren esterminaes—
nin autobiografía o memories.
L'últimu llobu enxamás deshumanizó l'arte de vivir,
foi un llobu con firmes principios,
un sofista de los d'enantes,
un xenerador de llinies d'opinión
pa un públicu difuntu.
Nunca se decató que fuere *l'escoyíu*,
el Xesucristu de la última cena,
el profeta qu'ensin sabelo
predicó'l final de los díes
peles mártires parroquies de la desolación.
L'últimu llobu anduvo ensin destín
hasta desaparecer en silenciu del mapa (d'Inglaterra)
ensin dexar güelga nin rastru de la so presencia.

XUICIU FINAL

Yá suenen les trompetes anunciando'l xuiciu final
—lleventen les oveyes el so olfatu al aire—
yá llega con pasu silenciosu,
vistíu con sayu d'inciensu,
un resplandor de niebla envueltu en solombra
—lladríos nerviosos avisen de la so presencia—.

Qué sele'l momentu maduru,
qué golor a última plegaria
nel templu la nueche.

Llegó la hora —escrita taba—
de rindir cuentos y pagar
les deudes del xuegu,
d'esperar na maurienta eternidá
la resurrección cabera de la carne.

CAMÍN

El llobu pasa.
Queda la tierra,
un rastru de lo que fuimos nes coraes del iviernu.
Les güelgues confuses del animal firíu,
al debalu, ensin más enfotu qu'atopar un techu
onde abellugar hasta escaecer l'alma.

L'aullíu d'un ecu rebundiando güérfanu
peles esferes del tiempu.

ÍNDIZ

Estadístiques.	9
<i>Hobbes on the road</i>	11
El paséu	13
Pequeñu anunciu floral	15
Política	17
Pastor	19
Cantu xeneral	21
L'últimu llobu d'Inglaterra	23
Algarada	25
Cuentu infantil	27
Esiliu	29
<i>Caperucita</i>	31
Collage 2.	33
Parque temáticu	35
Celu	37
Llobu solitariu	39
<i>Lupus est homo</i>	41
Xuiciu final	43
Home llobu	45
Refuxu	47
L'alcuentru	49
Dubia	51
Collage 1.	53

Amadís	55
Salvación	57
Razones pa un home solu	59
Faladurías	61
Visita guiada	63
Sueño	65
El cuentu de siempre	67
Herencia	69
Camín	71